

婁縣續志卷四

水利志上

邑境山川前志簡賅百年之中名山大川無甚變更惟邑境諸水遠承太湖近承吳淞自西北來源遠而緩弱浦潮迅疾以致弱不敵強渾沙溢入不能衝刷於是海潮似來源而五浦三泖經境內入海者反視爲委其弊豈僅關一邑也哉若夫榦河支港灌注旁通境界管轄皆明載前志惟通塞攸殊利病雜出宜加詳焉志水利

西北諸水

三泖

婁縣續志

卷四

水利

一

沿泖居民築圩爲田各私其利前兩江總督陶澍勒碑示禁永遠不准升科以三泖乃西北諸水瀦澤之區下流不暢則淫雨積潦田廬湮沒非僅一鄉一邑之害顧漲灘私墾年甚一年向爲鉅浸今爲細流有經世之責者可不加意與

黃浦

浦水向隸邑境者自米市塘至泖涇口之北岸耳浦灘有名庫浜者華婁分界處也光緒三年上憲委員履勘以浦水中分爲界南屬華亭北屬邑境

葑澳塘

塘水西北接澱河之水其支流西南爲腰涇又南爲

潘涇西爲沈巷鎮河皆淺塘左過天仙河向來蘆葦
墊漲今更淤塞

走馬塘

塘水東接橫山塘淺其南行東一支爲東山涇西爲
西山涇繞小崑山之麓而南爲小崑山鎮河皆淤淺
北爲金村蕩灣亦淺又南達面丈港東接瀆橋西達
泖水尚深其西爲北塘港西南爲西涇港華亭港水
皆達泖尚暢

連林塘

塘水東通滬北港折而南通機山浜今淺由東遞西
支流有駱家浜東九曲村港西九曲村港荷花蕩蔣
家浜港東竹管涇西竹管涇水皆南流入青邑之白
蕩今蕩皆淤又南分流爲落星橋析而西爲謝家村
港今塞機山浜之南爲雞鳴涇今淺

橫山塘

塘水日淺其西支水卽東山涇塘口有問津庵渡南
注折而來卽放生河已淤自東折而北一支爲小山
塘有山在塘之東爲小赤壁水亦淺稍北水東西流
者爲小山港淤橫山後爲橫山後港港西出陸徐邨
今淤塘之西一支北流爲何家堰一支南流爲太浜
折而東爲東庫俱南通瀆橋今皆淺

沈涇塘

塘水自青邑界來經張涇塘口入邑境東過察樹涇
涇水淤淺出鍾賈山羅山之間而東右通秀溪近溪
諸小港皆日見淺阻農船出入維艱過廣富林而南
過古山水橋港港口深濶又南右過楊斷左過長浜
水漸淺自長浜東北達計家罇官社塘遞南接小邱
涇水尚深自楊斷而南左過褚庵港遞南過黃家潭
口又南抵秀野橋滙秀州塘水皆淤阻非潮漲不能
行舟鄉人來城西繞古浦塘東繞沈村涇甚為紆遠
西南諸水

古浦塘

古浦自中橋港以東潮落淺甚近秀州塘者潮落則

婁縣續志

卷四

水利

三

數丈塘面灘高如岸水近一線行人待潮而濟甚為
苦之塘北諸港尚深塘南如李涇長壽涇朱六涇蘆
蕩涇潮落皆淺

西漢 遞北卽二里涇

漢口至二里涇往者呂岡涇壩未毀時潮水迅疾市
河不一年而刷深自土人將壩毀去而由西漢至城
非潮漲不能進矣道光二十六年松江府知府練廷璜偕紳士葉珪等築壩於呂岡涇壩成大司空張溫和公為文記之勒石堤上其文曰郡城西折而南十里為西漢黃浦入西漢由二里涇達市河蓄洩賴焉雍正初離商謀杜私販常築壩於漢截其流乾隆六年以支河淺涸復扶壩以納之然浦潮東南並入北來湖洑流弱不能敵震撼迅迫之勢更百餘年仍為民患矣先是涇西陳陀港有鎖水橋後橋廢而港口日侈漢水盛從入貫姚涇而北其分流入二里涇者蓋十分之二耳於是郡城內外諸

河道泥膠沙固頃年益甚郡城士大夫乃議於呂岡築壩使汙水直趨二里涇以利環城之河其地上承姚涇下注陳陀港者也請於前攝守徐君甫將起工會以去郡而罷余來守之次年謀成此舉復得廣文葉君理明經方君連所條十益四無害說時方伯張公祥和奉諱里居亦主其議在籍刺史黃公仁大令姚君棧願君夔參戎汪君溥遂先濬長三里河古所謂秀州塘者暢洩北來清水即繼以壩工焉壩長三十丈深二丈餘以三月丁巳經始迄四月丙戌竣事通用錢萬貫而適當絕水下石霖雨彌月急湍深流基虞弗奠誠禱力作始用鍵固可謂勞矣夫河渠利害苟非時代遼遠無大殊異然觀松郡衆水覈諸圖記其形勢變遷頗速要視旁郡不侔然則深蓄其源勤疏其委固有待後之知所藉手者而念諸君是役不可無記因備書其顛末云連平練廷璜撰文郡人張祥和書丹

二里涇之西南分流為橫涇遞南為鹽船河今皆淤塞

呂岡涇 前有壩今毀

婁縣續志 卷四 水利

涇水通小毛竹港今塞其西南有南姚涇短三里等河納浦潮者皆淺

秀州塘

自浙境來過茹塘口東北行滙長泖大泖黃橋門懸星涇又滙茹塘諸水交會勢甚湍激塘之南面丈港之北徐涇水久涸西新浜淤墊日甚餘屬金邑界者不載其附塘支河近城河者另載城河西來即秀州塘之水至跨塘橋下會古浦塘折而東過二里涇口漸淺又東經沈涇塘口蔣涇口淺甚至長橋以東折而北為菜花涇河折而南為大張涇非潮滿不能行舟矣

附城河諸支港北爲澤潤橋河北通白龍潭今淤墊日甚西北通小清河錢涇皆淺若包家橋河花園浜則塞矣南爲宋家橋河淺甚湛然庵浜谷陽橋河蔣涇小倉橋河并不能通舟楫矣谷陽之南爲笏溪荇溪亦淤塞宋家橋河之南爲金沙灘稍東爲瑁河亦塞

白龍潭舊廣十餘頃屢經開濬今大半漲墊

前志謂端午龍

舟競渡恆集於茲今無此舉已數十年矣明莫雲卿詩曰別有艷紅看不盡荷花十里妬榴裙今潭之中

惟蕭疏葭菼搖曳水濱耳

大張涇 小張涇會於花涇塘之北

米市塘 卽大張涇之南由此出浦

婁縣續志

卷四

水利

五

涇之西文浜武浜塘之東十景港梅家浜潮滿始可行舟其近張涇之諸支港潮沙已在在淤塞矣

官紹塘

近塘諸水如御史涇茶亭浜油車浜鰻鯉浜漚口橋港潮落淺甚大官紹塘以南水流頗暢

斜塘

塘水湍急其東北達西古浦塘南達石湖塘遞西通宅前港南北流者爲潢泗涇石湖塘南爲顧涇涇西爲頭陀港水流皆暢

懸星涇

涇水東達橫潦涇南過五舍港爲長泖大泖交匯之

所西接莊前港又西爲大蒸塘水深濶

黃橋門

北通斜塘南至六里堰入金山界水湍急

茹塘

塘之西通北灣梁涇南灣梁涇遞西通界涇六店灣
遞南通新涇東達斜港水皆深界涇之南有朱家涇
斜路港諸水今皆淤北爲油車浜同治四年紳士陳
宗親開濬

雪水涇

涇水南達塘滙北流過三秀橋爲江浙要道今淤淺
其支流東爲水廟港屈家浜北蕩聞賢橋港北爲趙

婁縣續志

卷四

水利

六

莊浜今皆淤甚

大蒸塘

塘水深濶其北爲分支湯練涇淤塞遞西爲毛家橋
港水深南爲石徑路通南莊塘今淤南莊塘東通六
店灣水深濶塘之南通鄭黃浜東卽四百畝蕩今淺

白蓮闕

白蓮闕南通秀州塘東北通長泖水深其北面支港
若水巷村錢家草薛家浜今皆淤

林家蕩

在白蓮闕之南水深濶西通屠家村塘水亦深

白牛蕩

其源自當湖來通雪水涇通馬莊塘至楓涇鎮過張家橋北流至毛家橋越大蒸塘塘西多屬青浦嘉善境在一保一區二區三區內者長一萬二千六百六十一丈地多墊漲舟楫難通其支流西北爲諸家浜楊俊浜亦淤土人云賈田港在楊俊浜之東淤塞難通此處若壩斷潮漲時下流之水盡歸白牛蕩水無壅闕矣

馬莊塘

塘水東北通白牛蕩水深濶其西分支爲三鈎浜東通廟港今淤塞築堰

麵杖港 在邑西南

婁縣續志 卷四 水利

七

港長九千一百三十丈西南界平湖嘉善水深濶

楓涇鎮河

道光十六年巡檢程德滋開濬同治五年紳士許辰珠等募鋪捐二千餘金開濬勒石記之
東北諸水

顧會浦

浦水出府治西中亭橋下今淤塞出通波門至五里塘口在華界皆淤淺自通波門外沿城西流達菜花涇亦淺自五里塘以北漸漸深濶北行左經朱家浜口浜水西通二里涇又北右過大塔浜左過盛家浜又北左過蔡成涇右過聖堂浜又北右過魚秧浜滙祥澤塘又北滙崧塘左過黃蠻涇和士涇又北爲青

邑界繞橫泖入吳淞

祥澤塘

塘水東北行至楊家汊口與泗涇會北入青浦界達橫泖西匯崧塘浦於玉皇閣與顧會浦合

崧塘浦

浦水亦由吳淞南來繞橫泖過孫涇入於顧會浦

泗涇

涇水自楊家汊口東流經通波涇外波涇口貫洞涇張涇抵蟠龍曩時港面三十丈今小其半矣然尙深暢

洞涇

婁縣續志

卷四

水利

八

涇水北出橫泖繞泗涇南流西過魚秧浜聖堂浜大塔浜東過盛家浜金家漚入華亭界達城河

張涇

涇水亦北出橫泖繞泗涇而南東過小長浜陳涇官涇繞俞塘而南入華亭界

蟠龍浦

浦水出吳淞江自曾家橋以北屬青邑境爲北蟠龍南爲南蟠龍過泗涇塘口爲華界至北長浜口入邑境繞俞塘又入華境○自顧會浦至蟠龍浦不受渾潮淤墊故水皆深暢諸支港亦無淺阻故詳幹河餘畧焉

浦滙塘

塘水受浦潮屢濬屢淤顧是塘爲漚瀆赴郡要衝農田灌輸塘南北不下數十萬畝支港皆藉塘水以資挹注境跨華婁上青四邑每經挑濬諸縣必併力興作其開浚章程詳見下卷

橫瀝 在七寶鎮之東

小涑 在七寶鎮之西

二河皆北承吳淞之水繞橫塘而南入華界其受浦潮而易淤與蒲滙塘同故開蒲塘則二水必兼籌焉

橫塘

東入黃浦西達青浦城下其在蟠龍以東塘北屬邑

婁縣續志

卷四

水利

九

境南屬華境蟠龍以西曰橫泖實則一水也北屬青浦境南屬邑境水頗深暢○橫塘之北有界浜浜北注爲新羅浜入橫瀝中貫橫浜浜東流爲朱家橋東達上邑又北流折而西至大木橋爲薛羊浜入橫瀝又北折而西爲牛橋港過橫瀝而西達袁洛浦又北至永力橋爲何家浜東至周家橋爲上邑界西過橫瀝入牛車涇橫浜又北流至東姚家滙又北至宋家浜西流爲丁家浜過橫瀝西達小涑北一支至沈陸橋爲沈長浜東接上邑界西入橫瀝又北爲唐家浜西北流由八字橋抵七寶鎮以上諸河皆受浦潮易淤農佃時爲挑浚橫塘之北橫瀝之西七寶鎮之中

南流者爲毛家浜西流者爲長浜折而南爲橫涇又折而西爲王家庫鎮南爲新開河河之西爲陸家角又西爲龔家浜入小涑小涑之東爲劉家浜西爲油車橋港南爲楊樹浦小涑之西南至薛家橋爲虬涇涇南一支爲蟠涇蟠涇之西一支南流爲張祖橋港西折爲小庵浜橫塘之南其東爲陳家浜浜水南流折而東入上邑界稍西爲漕河涇又西爲東才浜西才浜二浜之南爲王浜王浜東南爲闕家宅折而東爲浦家橋入上邑南爲盛家浜入華邑界以上諸支河皆受浦潮常患淤阻